



唐詩紀事卷第三十

李益

附僧廣宣杜羔
諸葛覺韋執中

耿漳

盧綸

韓翃

錢起

司空曙

苗發

崔峒

李端

冷朝陽

李益

益姑臧人字君虞大曆四年登第其受降城聞笛詩教坊樂人取為聲樂度曲又為寫征人歌早行詩為圖畫者迴樂峯前沙似雪之詩是也益有心疾不見用及為幽州劉濟營田副使獻詩有感恩知有地不上望京樓之句左遷右庶子年且老門人趙宗儒自宰相罷免年

七十餘益曰此吾爲東府所選進士也聞者憐益之困後遷禮部尚書致仕卒

益錄其從軍詩贈左補闕盧景亮自序云吾在兵間故爲文多軍旅之思或軍中酒酣塞上兵寢投劔秉筆散懷於斯文率皆出乎慷慨意氣武毅果厲本其涼國則世將之後乃西州之遺民歟亦其坎軻當世發憤之所致也

其詩皆建中貞元間作

夜上受降城聞笛詩云迴樂峯前沙似雪受降城下月如霜不知何處吹蘆管一夜征人盡望鄉

峯烽火全也

征人歌云胡風凍合礪鵝泉牧馬千群逐暖川塞外征

行無盡日年年移帳雪中天

曉角詩云邊霜一夜落平蕪吹角當城片月孤無數塞鴻飛不度秋風卷入小單于

從軍北征云天山雪後海風寒橫笛偏吹行路難磧裏征人三十萬一時迴向月明看

獻劉濟云草綠古燕州鶯聲引獨遊鴈歸天北畔春盡海西頭向日花偏落馳年水自流感恩知有地不上望

京樓

從軍有苦樂行

時從司空魚公北征作

云勞者且莫歌我欲歌送

觴行軍有苦樂此曲樂未央僕居在隴上隴水斷人觴

東過秦宮路宮樹入咸陽時逢漢帝出諫獵至長楊詐
馳遊俠窟非結少年場一旦承嘉惠輕身重恩光秉筆
參帷帟從軍至朔方邊地多陰風草木自淒涼斷絕西
海去出沒胡沙長參差引鴈翼隱鱗騰軍裝劔文夜如
水馬汗凍成霜使氣五都少矜功六郡良山河起目前
睚眦死路傍北馳逐獯虜西臨復舊疆昔還賦餘資今
出乃贏糧一矢致夏服我弓不再張寄言丈夫雄苦樂
身自當馳一作馳

來從竇車騎云行懶方束髮逢世屯懷恩抱明義讀書
良不武學劔斬非智遂別魯諸生來從竇車騎追兵捷

邊急絡馬黃金轡出入燕南陲由來重意氣自經皋蘭
戰入破樓煩地西北護三邊東南留一尉時過如雲雨
參差不自意將軍失恩澤萬事從此異置酒高臺上薄
暮秋風至長戟與我歸歸來同棄置自酌還自飲非名
又非利歌出易水寒琴下雍州淚出逢平樂舊言在天
階侍問我從軍苦自陳少年貴丈夫交四海徒論身自
致漢將不封侯蘇卿還遠使今我終此曲此曲誠不易
貴人難識心何由知忌諱
夜發軍中云邊馬櫪上驚雄劔匣中鳴半夜軍書至匈
奴寇六城中堅分暗陣太乙起神兵出沒風雲合蒼皇

射虎爭今日邊庭戰緣賞不緣名

五城道中云金鏡隨玉節落日河邊路沙鳴後騎來鴈
起前軍度五城鳴斥堠三秦新召募天寒白登道寒濁
陰山霧仍聞舊兵老上在烏蘭戍笳簫漢思繁旌旗邊
色故寢興倦弓甲勤後傷風露來遠賞不行鋒交勳乃
茂未知朔方道何年罷兵賦

塞下曲云蕃門部落能結束朝朝馳獵河南曲

一作朝
馳暮獵

曲冀河燕歌未斷塞鴻飛牧馬群嘶邊草綠秦築長城城
已催漢武北上單于臺古來征戰虜不盡至今還復天
兵來黃河東流流九折沙場埋恨何時絕蔡琰沒去造

胡笳蘇武歸來持漢節爲報如今都護雄匈奴且莫下

雲中請書塞北陰山石願比燕然車騎功

大曆十才子唐書不見人數盧綸錢起郎士元司空曙

李端李益苗發皇甫曾耿漳李嘉祐又云吉瑒夏侯審

亦是或云錢起盧綸司空曙皇甫曾李嘉祐吉中孚苗

發郎士元李益耿漳李端二李皆出於姑臧庶子爲文

章李益尚書爲門戶李益一日赴嘉會尚書曰今日兩

箇坐頭皆是李益

紅樓下聯句云佛刹接重城紅樓切大清紫雲連照灼

丹檻望崢嶸廣檉棟煙虹入軒窓日月平參差五陵晚

分背八川明李益絃韻風初過蓮枝浪欲傾敬瞻疑涌見

圍繞學無生杜羔

蘭陵僻居聯句云潘岳閑居賦陶潛獨酌謠二賢成往

事三徑是今朝廣宣生幸逢唐運昌時奉帝堯進能諧啓

沃退即混漁樵李益靈簡封延閣彫纓閣上霄相從清曠

地秋露挹蘭苔杜羔

天津橋南山各題一句云野坐分苔石益山行逸菊叢

韋執中雲衣惹不破諸葛秋色望來空

閑庭草色能留馬當路楊花不避人句笳簫漢恩繁旌

旗邊色故句馬汗凍成霜句右張為取為主客圖以益

為清奇雅正主

耿滂

元日早朝云九陌朝臣滿三朝候鼓賒遠砧時接韻攢

炬偶成花紫貝為高闕黃龍建大牙參差萬戟合左右

八貂斜羽扇紛朱檻金爐隔翠華微風傳曙漏曉日上

春霞環珮聲重疊蠻夷服等差樂和天易感山固壽無

涯渥澤千年聖車書四海家盛明多在位誰得守蓬麻

贈苗員外云為郎日賦詩小謝少年時業繼儒門後心

多道者期曉迴長樂殿新出永明祠行樂西園暮春風

動柳絲

許州書情寄韓張二舍人云謫宦軍城老更悲近來頻
夢到丹墀乍然乍滅心中火唯緝唯多鬢上絲繞院綠
苔聞鴈處滿庭黃葉閉門時故人高步雲衢上肯念前
程杳未期

贈嚴維云許詢清論重寂寞住山陰野客棲寒寺閉門
當古林海田秋熟早湖水夜漁深世上窮通理誰能柰
此心

贈郎公云來自西天竺持經奉紫微年深梵語變行若
俗人歸月上安禪父苔生出院稀深間有馴鴿不去爲
無機

早朝云鐘鼓餘聲裏千官向紫微冒寒人語少乘月燭
來稀清漏聞馳道紅霞映鎖闌猶看嘶馬處未啓掖垣
扉

秋日云返照入閭巷憂來誰與語古道無人行秋風動
禾黍

書情逢故人云因君知此事流恨已忘機客久多人識
年高衆病歸連雲朝色遠度雪鴈聲稀又說家林盡悽
傷淚滿衣

沙上鴈云衡陽多道里弱羽復哀音還塞知何日驚弦
亂此心夜陰前侶遠秋冷後湖深獨立沙汀意寧知霜

霰侵

贈張將軍云寒落邊城暮重門返照間鼓鼙驚雨暗士
馬過秋閑慣守臨邊郡曾營近海山關西舊業在夜夜
夢中還

酌暢當云同遊漆沮後已是十年餘幾度曾相夢何時
定得書月高城影盡霜重柳條疎且對樽中酒千般想

未如

書情逢故人以下四篇姚合取爲極玄集

滯寶應中進士爲左拾遺詩有家貧僮僕慢官罷友朋
疎世多傳之

盧綸

綸字允言河中人大曆進士與吉中孚韓翃錢起司空
曙苗發崔峒夏侯審李端皆能詩號大曆十才子春日
登樓云花正濃時人正愁逢花却欲替花羞年來笑伴
皆歸去今日清明獨上樓

長安春望云東風吹雨過青山却望千門草色閑家在
夢中何日到春歸江上幾人還川原繚繞浮雲外宮闕
參差落照間誰念爲儒多失意獨將衰鬢客秦關

貞元中吉中孚爲翰林學士薦綸于朝會丁家艱而中
孚卒大曆中李端錢起韓翃輩能爲五言詩詞情健麗
綸作尤工至貞元末錢李諸公凋落綸爲懷舊詩五十

韻叙其事曰吾與吉侍郎中孚司空郎中曙苗員外發
崔補闕峒耿拾遺滂李校書端風塵追遊向三十載數
公皆負當時盛稱榮耀未幾俱沉泉下傷悼之際暢博
士追感前事賦詩五十韻見寄輒有所酌以申悲舊兼
寄夏侯審侍郎其言諸子云侍郎文章宗傑出淮楚靈
掌賦若出籟司言如建瓴郎中善餘慶雅韻與琴清鬱
鬱松帶雪瀟瀟鴻入冥員外真貴儒弱冠被華纓月香
飄桂實乳溜瀝瓊英補闕思冲融巾拂藝亦精彩蝶戲
芳圃瑞雲滋翠屏拾遺興難侔逸調曠無程九醞貯彌
潔三花寒轉馨校書才智雄舉世一娉婷賭墅鬼神變

屬辭鸞鳳驚差肩曳長裾揔轡奉和鈴共賦璣臺雪
同觀金谷笙倚天方比劍沉水忽如瓶君持玉麟珠寫我
懷袖盈讀罷涕交頤願言躋百齡綸之才思皆此類也
綸德宗時為戶部郎中舅韋湏年表其才召見禁中帝
有所作輒賡和異日問湏年綸李益何在荅曰綸從渾
瑊在河中驛召之會卒文宗尤愛其詩問宰相綸文章
幾何亦有子否李德裕對綸四子皆擢進士第在臺閣
帝遣中人悉索家笥得詩五百篇以聞綸春詞云北苑
羅裙帶塵衢錦繡鞋醉眠芳樹下半被落花埋
得嶺南故人詩云瘴海寄雙魚中宵達我居兩行燈下

淚一紙嶺南書地說炎蒸極人稱老病餘殷勤祝賈誼
莫共酒盃踈

題興善寺後池云隔窓棲白鶴似與鏡湖隣月照何年
樹花逢幾度人岸沙青有路逕石綠無塵願得容依止
僧中老此身

山中古木云高林已蕭索夜雨復秋風墜葉鳴荒竹斜
根擁斷蓬半侵山影裏長在水聲中此地何人到雲門
去亦通

送李端云故關衰草遍離別自堪悲路出寒雲外人歸
暮雪時少孤為客慣多難識君遲掩泣空相向風塵何

所期

寄嶺南故人以下四篇姚合取為極玄集

膺月觀咸寧王部曲娑勒擒豹歌云山頭矐矐日將出
山下獵圍照初日前林有獸未識名將軍促騎無人聲
片形蜿伏草木動雙鵬旋轉群鷓鳴陰方質予纔三卜
譯語受詞蕃語揖捨鞍解甲疾如風人忽虎蹲獸人立
歛然扼顙批其頤爪牙委地涎淋漓既蘇復吼拘於教切
仍怒果叶英謀生致之拖自深叢目如電萬夫失容千
馬戰傳呼拜賀聲相連殺氣騰凌陰滿川始知縛虎如
縛鼠敗虜降羗在眼前祝爾嘉詞身無苦獻看將隨犀
象舞苑中流水禁中山期爾攫搏開天顏非熊之兆慶

無極願紀雄名傳百蠻

送張侍郎還蜀歌云秦家御史漢家郎親傳兩印征殊
方功成走馬朝天子伏檻談邊若流水曉離仙署趨紫
微夜接高儒讀青史瀘南五將望君還願以天書示百
蠻曲棧重江初過雨前旌後騎不同山迎車拜舞多耆
老舊卒新營遍青草塞口雲生火候遲煙中鶴唳軍行
早黃花川下水交橫遠映孤霞蜀國晴筇竹筍長椒瘴
起荔枝花發杜鵑鳴回首岷峩半天黑傳觴接膝何由
待空令豪士仰威名無復貧交恃顏色垂楊不動雨紛
紛錦帳胡笳爭送君須臾醉起簫笳發空見雙旌入白

雲

韓翃

字君平南陽人命以駕部郎中知制誥時有兩韓翃德
宗曰與詩人韓翃終中書舍人

翃別韋韓兵曹歸池州云南陵八月天暮色遠峯前
竹青楊路吳江赤馬舡腰金上客貴佩玉主人賢落日
應相逐西歸定幾年

侯希逸鎮青淄翃為從事罷府閑居十年李勉鎮夷門
辟為幕屬時已遲暮不得意多家居一日夜將半客叩
門急賀曰員外除駕部郎中知制誥翃愕然曰無矣客

曰郵報制誥闕人中書兩進名不從又請之曰與韓翃時有同姓名者為江淮刺史又具二人同進御批曰春城無處不飛花寒食東風御柳斜日暮漢宮傳蠟燭青煙散入五侯家又批曰與北韓翃客司此員外詩耶翃曰是也是不誤矣時建中初也

奉送王相公縉赴幽州巡邊云黃閣開帷幕丹墀侍冕旒位高湯左相權揔漢諸侯不改周南化仍分趙北憂雙旌過易水千騎入幽州塞草連天暮邊風動地秋無因隨遠道結束佩吳鉤

南部新書云昇平公主宅即席李端擅場送王相之

鎮翅擅場送劉相巡江淮錢起擅場

德宗西幸有神智驄如意騮二馬謂之功臣有一日進瑞鞭者上曰朕有二駿今得此可為三絕因吟翃觀調馬詩云鴛鴦赭白齒新齊晚日花間放碧蹄玉勒乍迴初噴沫金鞭欲下不成嘶高仲武云韓員外意放經史興致繁富一篇一詠朝野珎之多士之選也至如星河秋一鴈砧杵夜千家又客衣筒布細山舍荔枝繁又踈簾看雪捲深戶映花關方之前載則芙蓉出水未足多也其比興深於劉員外筋力減於皇甫冉也少年行云千點爛編噴玉驄青絲結尾繡纏駝鳴鞭曉

出銅臺路葉葉春衣楊柳風

羽林云駿馬牽來御柳中鳴鞭欲向渭橋東紅蹄亂踏
青城雪花領嬌嘶上苑風

題薦福衡岳禪師房云春城乞食還高論此中閑僧臘
堦前樹禪心江上山踈簾看雪捲深戶映花關晚送門
人去鐘聲杳靄間

送孫革及第東歸云過淮芳草歇千里又東歸野水吳

山出家林越鳥飛荷香隨去棹梅雨點行衣無數滄州

客如君達者稀少年行以下四章
姚合取為極玄集

送故人歸魯云魯客多歸興居人愴別情雨餘衫袖冷

風急馬蹄輕秋草靈光殿寒雲曲阜城知君拜親後少

婦下機迎韋莊又
玄集

世傳翊有寵姬柳氏翊成名從辟淄青置之都下數歲

寄詩曰章臺柳顏色青青今在否縱使長條似舊垂也

應攀折他人手柳荅曰楊柳枝芳菲節可惜年年贈離

別一葉隨風忽報秋縱使君來豈堪折後果為蕃將沙

吒利所劫翊會入中書道逢之謂永訣矣是日臨淄大

校置酒疑翊不樂具告之有虞候將許俊以義烈自許

即詐取得之以授韓希逸聞之曰似我往日所為也俊

復能之翊後為夷門幕府後生共目為惡詩輕之

李義山有韓翃舍人即事云萱草含丹粉荷花抱綠房
鳥應悲蜀帝蟬是怨齊王通內藏珠府應官解玉坊橋
南荀令過十里送花香

錢起

送彈琴李長史赴洪州云抱琴為傲吏孤棹復南行幾
度秋江水皆添白雪聲佳期來客夢幽興緩王程佐牧
無勞問心和政自平

姚合取為
極玄集

起還藍田王維贈別云草色日向好桃源人去稀手持
平子賦目送老萊衣每候山櫻發時同海燕歸今年寒
食酒應得返柴扉起荅詩云卑栖却得性每與白雲歸

徭祿仍懷橘看山免採薇

一作別山如昨日春露已
採薇頻盈夢看花空厭歸

暮禽先去馬新月待開扉霄漢時迴首知音青瑣闈

王維春夜竹亭贈起歸藍田詩云夜靜群動息時聞隔

林犬却憶山中時人家澗西遠羨君明發去采薇輕軒

冕起荅云山月隨客來主人興不淺今宵竹林下誰覺

花源遠惆悵曉鶯啼孤雲還絕巖

贈闕下裴舍人云二月黃鶯飛上林春城紫禁曉陰陰

長樂鐘聲花外盡龍池柳色雨中深陽和不散窮途恨

霄漢長懷捧日心獻賦十年猶未遇羞將白髮對華簪

東臯早春寄郎校書云祿微賴學稼歲起歸衡茅窮達

戀明主耕桑亦近郊夜來霽山雪陽氣動林梢萌蕙暖
初吐春鳩鳴欲巢蓬萊時入夢知子憶貧交

題玉山人所居壁云谷口好泉石居人能陸沉牛羊上山
小煙火隔雲深一徑入溪色數家連竹陰藏虹辭晚雨
驚隼落殘禽涉趣皆流目將歸必在林却思黃綬事辜
負紫芝心

逃暑太子李舍人別業云下馬失炎暑重門深綠篁宮
臣禮嘉客林表開蘭堂茲夕興難盡澄壘照墨塲東林
晚來好目極趣何長鳥路掛疎雨人家殘夕陽城隅擁
歸騎留醉戀群芳

和張僕射塞下曲云月黑鴈飛高單于夜遁逃欲將輕
騎逐大雪滿弓刀

司空曙

和耿拾遺元日早朝云元朔爭朝闕奔流若會溟路塵
和薄霧騎火接低星漏促雙魚鑰車喧百子鈴冕旒當
翠殿幢戟滿彤庭表歲方編瑞乘春即宥刑諸侯陳禹
玉司曆獻堯奠壽酒三觴退蕭韶九奏停太陽開物象
沛澤及生靈南陌祥光紫東方曉氣青自憐揚子賤歸
草太玄經

立秋日云律變新秋至蕭條自此初花酣蓮報謝葉在

柳呈疎淡月多雲映清風自雨餘捲簾涼暗度却扇暑
先除草靜多翻燕波澄乍露魚今朝散騎省作賦興何
如

酬張芬有赦後見贈云紫鳳朝銜五色書陽春忽布網
羅除已將心變寒灰後豈料先生腐草餘建水風煙收
客淚杜陵花竹夢郊居勞君故有詩相贈欲報瓊瑤恨
不如

晦日益州北池陪宴云臨泛從公日仙舟翠幕張七橋
通碧澗雙樹接花塘玉燭收寒氣金波隱夕光野聞歌
管思水靜綺羅香遊騎繁林遠飛旆截岸長郊原懷灞

渡波漾寫江潢常侍傳花詔偏裨同羽觴豈令南峴首
千載播餘芳

曙字文明廣平人登進士第從韋皋於劍南貞元中爲
水部郎中終虞部

耿漳就宿因傷故人云舊時聞笛淚此夜重霑衣方恨
同懷少那堪相見稀竹烟疑澗壑林雪侶芳菲多謝勞
車馬應憐獨掩扉

經廢寶光寺云黃葉前朝寺無僧寒殿開池晴龜出曝
松暝鶴飛回古砌碑橫草陰廊畫雜苔禪宮亦銷歇塵
世轉堪哀

春日野望寄錢員外起云草長花落樹羸病強尋春無
復少年意空餘華髮新青原晴見水白社靜逢人寄謝
南宮客軒車不見親

喜外第盧綸見宿云靜夜四無隣荒居舊業貧雨中黃
葉樹燈下白頭人以我獨沉久媿君相見頻平生自有
分况是蔡家親

送王閏云相送臨寒水蒼然望故關江蕪連夢澤楚雪
入商山話我他年舊看君此日閒因將自悲淚一洒別
離顏

新蟬云今朝蟬忽鳴羈客若為情漸覺一年謝能令萬
感生微風初滿樹落日稍沉城為問同懷者淒涼聽樂
聲

望水云高樓晴見水楚色靄相和野極空如練天遙不
辨波水無人跡到時有鳥行過况是蒼茫外殘陽照最
多

哭麴象云憶昨秋風起君曾嘆逐臣何言芳草日自作
九泉人

取就宿以下七篇
姚合取為極玄集

苗發

送司空曙之蘇州詩云盤門吳舊地蟬盡早秋時歸國
人皆久移家君獨遲廣陵經水宿建鄴有僧期若到栖

霞寺應看江撈碑

送孫諭德罷官往黔州

孫曾牧此州因寄家也

云中歲分符典石

城兩朝趨陞謁承明闕下昨陳歸老疏天南今切去鄉情親知握手三秋別儿杖扶身萬里行伯道暮年無嗣子欲將家事託門生

發晉卿子終都官員外郎

崔峒

寄上禮部李侍郎云吳楚相逢處江湖共泛時任風舟去遠待月酒行遲白髮常同嘆青雲本異期貴來君少愁去我先悲玉佩明朝盛蒼苔陋巷滋追尋恨無

惟有夢相思

江上書懷云骨肉天涯別江山日落時淚流襟上血髮白鏡中絲胡越書難到存亡夢豈知登高廻首罷形影自相隨

喜逢妻弟鄭損因送入京詩云亂後自江城相逢喜復驚為經多載別欲問小時名對酒悲前事論文畏後生遙知盈卷軸紙貴在江城

詠門上畫小松上元王杜三相公云昔聞生澗底今見起毫端衆草此時沒何人知歲寒豈能裨棟宇且貴出門闌只在丹青意凌雲也不難

題崇福寺禪師院云僧家竟何事掃地與焚香清磬度
山翠閑雲來竹房身心塵外遠歲月坐中長向晚禪堂
閉無人空夕陽

峒有初入集賢院贈李獻任詩峒與李初同官於常山
又有拜拾遺酌丘二十二見贈詩云江海久垂綸朝衣
忽掛身丹墀方悟主白髮免羞人才貴文章士名當諫
諍臣空餘薦賢分不敢負交親

嚴維送峒使往睦州云如今相府用英髦獨往南州肯
告勞冰尔近開漁浦出雪雲初卷定山高木蘭花映桐
廬縣青雀舟隨白鷺濤使者應須訪庶吏府中唯有范

功曹

高仲武云峒詩文彩炳發意思雅淡如清磬度山翠閑
雲來竹房又流水聲中視公事寒山影裏見人家此亦
披沙鍊金時時見寶也

峒登進士第為拾遺入集賢為學士後終州刺史或云
終玄武令文藝傳云終右補闕峒寄李明府云松堂寂
寂對煙霞五柳門前集晚鷗流水聲中視公事寒山影
裏見人家觀風共美新為政計日還應更觸邪可惜陶
潛無限酒不逢籬菊正開花

李端

古別離詩云水國葉黃時洞庭霜落夜行舟問商賈宿
在楓林下此地送君還茫茫似夢間後期知幾日前路
轉多山巫峽通湘浦迢迢隔雲雨天晴見海橋月落聞
津鼓人老自多愁水深難急流清宵歌一曲白首對汀

洲

贈郭駙馬詩云

郭令公子驥尚昇平
公主此詩席上成

青春都尉最風流

二十功成便拜侯金距鬪雞過上苑玉鞭駙馬出長楸
薰香荀令偏憐小傅粉何郎不解愁日暮吹簫楊柳陌
路人遙指鳳凰樓駙字一作驥又云方塘似鏡草芊芊初月
如鈎未上弦新開金埒看調馬舊賜銅山許鑄錢楊柳

入樓吹玉笛芙蓉出水妬花鈿今朝都尉如相顧願脫
長裾學少年

端趙州人始郭曖尚昇平公主賢明有才思尤多招士
端等多從曖遊曖進官大集客端賦詩最工錢起曰素
爲之請賦起姓文工於前客乃服

端賦巫山高云巫山十二峯皆在碧虛中回合雲藏日
霏微雨帶風猿聲寒過水樹色暮連空愁向高唐望清
秋見楚宮

蜀路有飛泉亭中詩板百餘篇後薛能佐李福於蜀道
過此題云賈掾曾空去題詩豈易哉悉去諸板唯留端

巫山高一篇而已

贈苗發云朱戶敞高扉青槐礙落暉八龍承慶重三虎
連朝歸坐竹人聲絕橫琴鳥語稀花慚潘岳貌年稱老
萊衣葉暗新櫻孰絲長粉蝶飛應憐魯儒賤空與故山
違

茂陵山行陪韋金部云宿雨朝來歇空山天氣清盤雲
雙鶴下隔水一蟬鳴古道黃花落平蕪赤燒生茂陵雖
有病猶得伴君行

雲際中峯云自得中峯住深林亦閉關經秋無客到入
夜有僧還暗澗泉聲小荒崗樹影閑高亭不可望星月

滿空山

蕪城懷古云風吹城上樹草沒城下路城裏月明時精

靈自來去

贈苗發以下四篇
姚合取為極玄集

冷朝陽

登靈善寺塔云飛閣青霞裡先秋獨早涼天花映窓近
月桂覆簷香華嶽三峯小黃河一帶長空聞指歸路煙
處有垂楊

中秋與空上人同宿華嚴寺云掃榻相逢宿論詩舊梵
宮鐘聲迎鼓盡月色過山窮庭宿安禪草窓飛帶火虫
一宵何惜別回首隔秋風

立春詩云玉律傳佳節青陽應此辰土牛呈歲稔綵燕
表年春鴈盡星迴次寒餘月建寅風光何處好雲物望
中新流水空銷凍潛魚欲振鱗梅花將柳色偏思越鄉
人

潞州節度薛嵩有青衣善彈阮咸琴手紋隱起如紅線
因以名之一日辭去朝陽爲詞曰採菱歌怨木蘭舟送
客魂銷百尺樓還似洛妃乘霧去碧天無際水東流
李嘉祐送朝陽登第歸江寧云高第猶佳句諸生似者
稀長安帶酒別建業候潮歸稚子歡迎棹隣人爲掃扉
含情過舊浦鷗鳥亦依依

朝陽登大曆進士第爲薛嵩幕府錢起送朝陽擢第後
歸金陵覲省詩云萊子晝歸今始好潘園景色夏偏濃
夕陽流水吟詩去明月青山出竹逢兄弟相親初讓果
鄉人爭賀舊登龍佳期少別俄千里雲樹愁看過幾重

唐詩紀事卷第三十

唐詩紀事卷第三十一

竇叔向

竇常

竇牟

竇羣

竇庠

竇鞏

常建

李約

柳中庸

郭郎

韋處厚

權德輿

張薦

崔邠

楊於陵

許孟容

馮伉

潘孟陽

武少儀

鄭常

鄭轅

韓濬

王濯

張莒

張叔良

竇叔向

五子常牟羣庠鞏

叔向字遺直京兆人代宗時常袞為相用為左拾遺內

供奉及貶亦出爲溧水令四子登第羣以處士隱毗陵
韋夏卿薦之朝德宗擢爲左拾遺代武元衡爲中丞薦
呂溫楊士諤爲御史李吉甫以二人躁險持不下群怨
吉甫伺吉甫陰事幾爲憲宗所誅羣與元常年弟庠輩
皆爲郎工詞章爲聯珠集行於時義取昆弟若五星然
常字中行登第隱居二十年終國子祭酒年字貽周終
國子司業庠字胄卿終婺州刺史輩字友封元稹節度
武昌辟爲御史中丞克副使雅裕有名于時平居與人
言若不出口世號聶嘯翁卒於武昌

叔向寒食賜火云恩光及小臣華燭忽驚春電影隨中

使星輝拂路人幸因榆柳暖一照草茅貧

端午日恩賜百索云仙宮長命縷端午降殊私事盛蛟
龍見恩深犬馬知餘生儻可續終冀荅明時

酬李袁州嘉祐云少年輕會復輕離老大關心揔是悲
強說前程聊自慰未知携手定何時公才屈指登黃閣
匪服胡顏上赤墀想到長安誦佳句滿朝誰不念瓊枝
蓋嘉祐以詩送叔向并寄其弟紆云自歎未霑黃紙詔
那堪遠送赤墀人老爲僑客偏相戀素是詩家倍益親
妻兒共載無羈思鴛鴦同行不負身憑爾將書通令弟
惟論華髮愧頭巾故叔向詩有瓊枝之句

竇常

常任武陵寒食日次松滋渡先寄劉員外云杏花榆莢
曉風前雲際離離上峽舡江轉數程淹驛騎楚曾三戶
少人煙看春又過清明節筭老重經癸巳年幸得柱山
當郡舍在朝常詠卜居篇

常初登第桑道茂云二十年後出官後五度奏官勅皆
不下即攝職久之至大曆十四年及第即二十年矣
北固晚眺云小園芒種後梅天風雨涼露蠶開晚簇江
燕逸危檣山趾北來固潮頭西去長年年此登眺人事
幾銷亡

七夕寄懷云露盤花水望三星髮髯虛無降巨靈斜漢
沒時人不寐幾條蛛網下風庭

竇牟

元日喜聞大禮寄四學士六舍人云有事郊壇畢無私
日月臨歲華春更早天瑞雪猶深玉輦回時令金門降
德音翰飛鴛別侶叢植桂爲林粉澤資鴻筆薰和本素
琴禮成戎器下息徹鬼方沉麟爵來稱紀官師退絕箴
道風黃閣靜祥影紫垣陰壽酒朝時獻農書夜直尋國
香煴翠幄庭燎施紅衾漢魏文章盛堯湯雨露霑密辭
投水石精義出沙金宸扆親惟敬鈞衡近匪侵長驅千

里駿清喚九霄禽慶賜迎新服齊莊棄舊簪忽思班女
怨遙聽越人吟末路甘貧病流年苦滯淫夢中青瑣闥
歸處碧山岑竊抃聞韶濩觀光想隸任大哉寰海晏不
筭子牟心

牟秋夕閑居對雨贈別盧坦云燕燕辭巢蟬蛻枝窮居
積雨壞藩籬夜長簷溜寒無寢日宴厨煙濕未炊悟主
一言那可學從軍五百竟徒爲故人駿馬朝天使洛下
秋聲恐要知

竇羣

黔中書懷云萬事非經國千山擁麗譙佩刀看日曬賜

馬傍江調言語多重譯壺觴每獨謠公流如著翅不敢
問歸橈

竇庠

陪留守韓僕射巡內至上陽宮感歎云愁煙漠漠草離
離太乙鈎陳處處疑薄暮毀垣春雨裏殘花猶發萬年
枝

竇鞏

代隣叟云年來七十罷耕桑就暖支羸強下牀滿眼兒
孫身外事閑梳白髮對殘陽
永寧小園寄接近校書云故里心期柰別何手栽芳樹

憶庭柯東臯黍熟君應醉梨葉初紅白露多

寄南遊弟兄云書來未報幾時還知在三湖五嶺間獨立衡門秋水闊寒鷗飛去日銜山

自京將赴黔南云風雨荊州二月天問人初顧峽中舡西南一望雲和水猶道黔南有四千

南遊感興云傷心欲問當時事惟見江流去不迴日暮東風春草綠鷓鴣飛上越王臺

放魚云金錢贖得免刀痕聞道禽魚亦感恩好去長江千萬里不須辛苦上龍門

宮人斜云離宮遠路北原斜生死恩深不到家雲雨今

歸何處去黃鸝飛上野棠花

新營別墅寄兄云懶性如今成野人行藏由興不由身莫驚此度歸來晚買得山居正值春

樂天與微之書云君興有餘力且與僕悉索還往詩中取其尤長者如張十八古樂府李二十新歌行也紳盧揚

二秘書律詩貞與寶七也元八絕句博考精掇編而次之號元白往還詩集衆君子得擬議於此者莫不踊躍

歡喜以為盛事

常建

清晨入古寺初日照高林竹徑通幽處禪房花木深山

光悅鳥性潭影空人心萬籟此都寂但餘鐘磬音

題破山後

禪寺院

江山調玉琴一弦清一心泠泠七弦遍萬木澄幽陰能使江月白又令江水深始知梧桐枝可以徹黃金

江上琴興

夢太白西峯云夢寐昇九崖杳靄逢元君遺我太白峯寥寥辭垢氛結宇在星漢宴林閉氤氳簷楹覆餘翠巾舄生片雲時往溪谷間孤亭晝仍曛松峯引天影石瀨清霞文恬目緩舟趣霽心投鳥群春風又搖擢潭鳥花紛紛

宿王昌齡隱居云清溪深不測隱處惟孤雲松際露微

月清光猶爲君茅亭宿花鳥藥院滋苔紋余亦謝

西山鸞鶴群

歐陽永叔云吾嘗愛建竹逕通幽處禪房花木深欲效其語作一聯久不可得始知造意者爲難工也來青州得一山齋不意平生想見而不能道以言者乃爲已有於是益欲希其髣髴竟爾莫獲一言

卅陽殷璠撰河岳英靈集首列建詩愛其山光悅鳥性潭影空人心

商璠云高才而無貴位誠哉是言也曩劉楨死於文學左思終於記室鮑昭卒於參軍今常建亦淪於一尉悲

夫建詩似初發通莊却尋野逕百里之外方歸大道所以其旨遠其興僻佳句輒來惟論意表至如松際露微月清光猶爲君又山光悅鳥性潭影空人心此例數十句並可稱爲警策一篇盡善者戰餘落日黃軍敗鼓聲死今與山鬼隣殘兵哭遼水思既邈古詞又警絕潘岳雖云能叙悲怨未見如此章句也

昭君墓云漢宮豈不死異城傷獨沒萬里馱黃金蛾眉爲枯骨迴軍夜出塞立馬皆不發共恨丹青人墳上哭明月

吊王將軍墓云嫫姚北伐時深入強千里戰餘落日黃

軍敗鼓聲死常聞漢飛將可奪單于壘今與山鬼隣殘兵哭遼水

送李十一尉臨溪云泠泠花下琴君唱渡江吟天際一帆影預懸離別心以言神仙尉因致瑤華音迴軫撫商調越溪澄碧林

李約

汧公勉之子也爲兵部外郎與主客外郎張諗同官每單床靜言連旦不寐故約贈韋徵君沉詩曰我有心中事不向韋三說秋夜洛陽城明月照張八

歲日感懷云曙氣變東風蟾壺夜漏窮春心幾人老舊

曆四時空身賤悲添歲家貧喜過冬稱觴唯有感喜慶
在兒童

柳中庸

段成式酉陽雜俎載柳中庸善易嘗詣普寂公公曰筮
吾心所在也柳曰和尚心在前簷第七題復問之在某
處寂曰萬物無逃於數也吾將逃矣嘗測試之柳久之
瞿然曰至矣寂然不動吾無得而知矣

郭鄭

寒食寄李補闕云蘭陵士女滿晴川郊外紛紛拜古塹
萬井閭閻皆禁火九原松柏自生煙人間後事悲前事

鏡裏今年老去年介子終知祿不及王孫誰肯一相憐
李公垂云常州建元寺在郡東郭松扉竹院各在崗阜
每寒食里人洒掃經過之所大曆中詩人郭鄭賦寒食
詩當時以為絕唱嘗在兒童即聞此詩因和云江城物
候傷心地遠寺經過禁火辰步草壠邊回首客野花叢
裏斷腸人紫荊繁艷空門畫紅藥深開古殿春歎惜光
陰催白髮莫悲風月獨沾巾
皇甫冉送鄭詩云纔見吳洲百草春已聞燕鴈一聲新
秋風何處催年急偏逐山行水宿人
鄭大曆貞元詩人也

唐詩集卷三十一
韋處厚

盛山十二詩韓退之序云韋侯昔以考功顯曹盛山僻
郡奪所宜處納之惡地以枉其材韋侯將怨且不釋矣
或曰不然夫得利則躍躍以喜不得利則戚戚以泣若
不可生者豈韋侯之謂哉韋侯讀六藝之文探周公孔
子之意又妙能爲辭章可謂儒者夫儒者之於患難苟
非其自取之其拒而不受於懷也若築河堤以障屋雷
其容而消之也若水之於海冰之於夏日其玩而忘之
以文辭也若奏金石以破蟋蟀之鳴虫飛之聲况一不
快於考功盛山一出入息之間哉未幾果有以韋侯所

爲十二詩遺余者其意方且以入溪谷上巖石追逐雲
月不足日爲事讀而詠歌之令人欲棄百事往而與之
游不知其出於巴東以屬胸臆也于時應而和者凡十
人及此韋侯爲中書舍人侍講六經禁中和者通判元
司馬積爲宰相洋州許使君唐佐爲京兆忠州白使君
居易爲中書舍人李使君景儉爲諫議大夫黔府嚴中
丞謨爲秘書少監溫司馬造爲起居舍人皆集闕下於
是盛山之十二詩與其和者大行於時聯爲大卷家有
之焉慕而爲者將日益多則分爲別卷韋侯俾予題其
首

隱月岫云初映鈎如線終銜鏡似鈎遠澄秋水色高倚
曉河流

上士竝泉云為柳律師置綆汲豈無井巖顛貴非浚願洗塵
垢餘一兩根莖潤

權德輿

雜詩云婉彼嬴氏女吹簫偶簫史彩鸞駕非煙綽約兩
仙子神期諒交感相顧乃如此豈比成都人琴心中夜
起又云陽臺巫山上風雨忽清曠朝雲與遊龍變化千
萬狀魂交復目斷縹緲難比况蘭澤不可親凝情坐惆
悵又云淇水春正綠上宮蘭葉齊光風兩搖蕩鳴珮

中閨一顧授橫波千金呈瓠犀徒然路傍子恍恍復悽
悽

侍御舅初免職歸東山寄以詩云靡靡南軒蕙迎風轉
芬滋落落幽澗松百尺無附枝世物自多故達人心不
羈偶陳幕中畫未負林間期感恩從慰薦循性難繫維
野鶴無俗質孤雲多異姿清冷松露泫照灼巖花遲終
當稅塵駕來就東山嬉

江行四首云曉風搖五兩殘月映石壁稍稍曙光開片
帆在空碧曄孤舟漾暖景獨鶴下秋空安流日正晝淨
綠天無風晝右古樹夕陽盡空江暮靄收寂寥叩舡坐獨

生千里愁右猿聲到枕上愁夢紛難理寂寂深夜寒清
霜落秋水右

德輿字載之元和中爲相其文雅正瞻緝動止無外飾
其醞籍風流自然可慕

楊嗣復序其文集曰貞元中奉詔考定賢良草澤之士
升名七十七人及爲禮部侍郎擢進士第者七十有二
鸞鳳杞梓舉集其門登輔相之位者前後十人

載之送陳秀才應舉序云陳侯工詩賦長波清瀾浩浩
不窮屯田柳郎中爲予誦其佳句曰地偏雲自起日暮
山更深及後見其卷又有過於此者

和潘孟陽迴文絕句云酒杯春醉好飛雲晚庭閑久憶
同前賞中林對遠山

張薦

德宗時薦作祕書監權載之以離合詩贈之云黃葉從
風散暗嗟時節換忽見鬢邊霜勿辭林下觴躬行君子
道身負芳名早帳殿漢官儀巾車塞垣草交情劇斷金
文律每招尋始知逢山下如見古人心薦和云移居既
同里多幸陪君子弘雅重當朝弓旌早見招植根瓊林
圃直上金闈步觀深子玉銘相競相如賦間闕向春闈
日復想光儀格言信難繼木石強爲詞

薦和潘孟陽迴文絕句云遲遲日氣暖漫漫雪天春如
君欲醉飲思見此交親

薦字孝舉唐史有傳

崔邠

和權載之離合詩云脉脉羨佳期月夜吟麗詞諫垣既
隨步東觀方承顧竹雪消艷陽簡冊漏華光重坐芝蘭
室千載各芬芳節苦文俱盛即時人並命翩翩紫睿中
羽翮相輝映
字處仁時為中書舍人唐史有傳

揚於陵

和權載之離合詩云校德盡瑰璋才臣時所揚放情寄
文律方茂經邦術王猷符發揮十載契心期晝遊有嘉
話書法無隱辭信茲酌和美言語芝蘭比昨來恣吟
日覺祛蒙鄙
時為中書舍人唐史有傳

許孟容

答權載之離合詩曰敏才司祕府文替今超古亦有擅
風騷六聯文墨曹聖賢三代意工藝十金字化識從臣
謠人推仙閣吏如登崑閣時口誦靈真詞孫簡下威鳳
系霜瓊玉枝

時為給事中唐史有傳

馮伉

和權載之離合詩云車馬退朝後韋懷在文友動詞宗
伯雄重美良史功亦曾吟鮑謝二妙尤增價兩霜鴻喚
天匝樹烏鳴夜卓思客縱橫早擅希代名息心欲焚硯
自覲陪群英

時為給事中唐史有傳

潘孟陽

和權載之離合詩云詠歌有離合未夜觀酬荅筍中操
綵箋竹簡何足編意深俱妙絕心契交情結許彼官接

聯言初並清切翔集本相隨羽儀良在斯煙雲競文藻

因喜翫新詩

春日雪以迴文絕句呈張薦權德輿云春梅雜落雪發
樹幾花開真須盡興飲仁里願同來時未四十為戶部
侍郎唐史有傳

武少儀

和權載之離合詩云少年慕時彥小晤文多變木鐸比
群英八方流德聲雷陳美交契雨雪音塵繼恩顧各飛
翔因詩覩瑰麗傳野絕遺賢人希有盛遷早欽風與雅
日詠贈酬篇

時爲國子司業

鄭常

寄邢逸人云羨君無外事日與世情稀地僻人難別溪深鳥自飛儒衣荷葉老野飯藥苗肥疇昔江湖意如今憶共歸

謫居漁陽至白沙阻雨題驛云漁陽知近遠見說過滄城雲雨經春客江山幾日程終隨鷗鳥去祇待海潮生前路逢漁父多慙問姓名

送頭陀上人自廬東山歸溪云僧家無住著早晚出東林行道非真相頭陀是苦心持齋山菓熟倚錫野雲深

溪寺誰相待香花與梵音

高仲武云常省靜婉靡雖未洪深已入文流翻翻然有士風故錄之

鄭轅

清明賜新火詩云改火清明後優恩賜近臣漏殘丹禁晚燧發白榆新瑞彩來雙闕神光煥四隣氣回侯第暖煙散帝城春利用調羹鼎餘輝燭緡紳皇明如照隱願及聚螢人

轅大曆九年進士

韓濬

清明賜新火詩云王騎傳紅燭天厨賜近臣火隨黃道
見煙繞白榆新榮耀分他室恩光共此辰更調金鼎膳
還暖玉堂人灼灼千門映輝輝萬井春應憐聚螢者瞻
望獨無隣

李端送濬及第歸江東覲省詩云登龍并折桂歸去當
高車舊楚楓猶暗前隋柳已疎月中逢漢客浪裡得鄉
書見說江邊住知君不厭魚

濬大曆九年進士

王濯

清明賜新火詩云御火傳香殿華光及侍臣星流中使

馬燭燿九衢人傳影連金屋分輝麗錦茵焰迎紅藥發
煙染綠條春助律和風早添爐暖氣新誰憐一寒士猶
望照東鄰

濯登大曆九年進士第

張莒

元日望含元殿御扇開合詩云萬國來朝歲千秋觀聖
君贊迎仙仗出扇匝御香焚俯對朝容近先知曙色分
冕旒開處見鐘磬合時聞影動承朝日花攢似慶雲蒲
葵那可比徒用隔炎氛

柳子厚先友碑云莒長山人登大曆九年第大中時官

吏部外郎

張叔良

長至日上公獻壽詩云鳳闕晴鐘動鷄人曉漏長九重
初啓鑰三事正稱觴日至龍顏近天旋聖曆昌休光連
雪淨瑞氣雜爐香化被君恩洽恩沾士庶康不因稽典
舊誰得紀朝章

叔良登廣德二年進士第

唐詩紀事卷第三十一

